

R. R. L. L. ^mremotaru samaluden Montij Regy prope Kanaara ^m

SECUNDA SECUNDÆ PARTIS
THEOLOGIÆ
SPIRITUALIS,

SEU
SCIENTIÆ SALUTIS,

Benè Beatequē vivendi

IN
Tempore, ac Æternitate.

DE
CAUSA OBJECTIVA;
SEU
MATERIALI, FORMALI,
ET
EXEMPLARI

*Actuum Vitæ Christianæ,
sive Spiritualis.*

AUTHORE R. P. FELICE SIMPLICI ŁACKI,
S. Theol. Profess. & Priore Monast. B. MARIAE V. de Oliva, S. O. Cisterc.

Typis MONASTERII OLIVENSIS Sacri Ordinis Cisterciensis,

Imprimebat JOANNES JACOBUS TEXTOR, Anno M. DC. LXXXVII.

SECUNDA SECUNDA PARTIS
THEOLOGIAE

SPIRITUALIS

SCIENTIAE SALUTIS

(e) 24 VII

Tempore, ad

CAUSA OBJECTIVA

MATERIALI FORMALI

EXEMPLARI

Adhuc in

Adhuc in

Adhuc in

SECUNDA SECUNDÆ PARTIS
THEOLOGICÆ SPIRITUALIS, DE CAUSA
OBJECTIVA, SEU MATERIALI, FORMALI,
ET EXEMPLARI ACTUUM VITÆ CHRI-
STIANÆ, SEU SPIRITUALIS.

Primò. *Causa Materialis* actuum Vitæ Spiritualis, est Objectum Materiale, circa quod versantur iidem actus, quosue idem obiectum terminat. Est autem obiectum materiale virtutis duplex: Remotum, & Proximum. *Remotum*, quales sunt v. g. in iustitia Res, uti pecunia, fama &c. *Proximum*, quales sunt v. g. in iustitia Operationes capaces iustitialis rectitudinis, vel irrectitudinis. Quid verò causet hoc obiectum materiale, & qualem causalitatem exerceat, videbimus infra.

2dò. *Causa Formalis* actuum vitæ spiritualis quæ morales seu boni formaliter sunt, est obiectum formale eorundem actuum motivum; quale motivum virtutum Theologicarum est aliqua perfectio Divina v. g. respectu Chritatis summa Bonitas DEI in se spectata. Obiectum autem formale motivum actuum vitæ spiritualis, quæ moraliter bonorum in Esse formali, est ipsa Honestas obiectiva virtutum per rationem intenta. Quia ut Arist. ait: Ad operandum studiosè, non satis est facere, quod honestum est, sed oportet operari, c. 4. quia honestum est. Hæc autem honestas obiectiva dupliciter derivatur in actum moralem: Imò; à fine intrinseco sed intento, qui est honestum bonum intrinsecè immanens actui obiectivo honesto v. g. Actui Eleemosynæ. 2do; à fine extrinseco intento: Sicut v. g. actus indifferentes comedendi & dormiendi cohonestantur à Gloria DEI intenta per tales actus. Finis nam-

que hic uterque accipit rationem obiecti formalis motivi per ordinem ad actus. Imo & aliæ circumstantiæ derivant rationem formæ seu honestatis vel inhonestatis in actum, ut Theologis placet. Porro *honestas obiecti materialis virtutum, est consonantia seu conformitas obiecti seu actus obiectivè concepti cum natura rationali, quâ tali*. Ratio est; quia etiam hæc consonantia cum natura rationali ut tali reperitur in actibus Divinis. Etenim si quærat, cur DEUS amet, præcipiatquæ veritatem? *Respondetur ultimo* resolutoriè; quia veritatem dicere est conforme naturæ rationali; ita ut ejus oppositum nempe mendacium sit eidem naturæ difforme, eamquæ dedeceat. Si verò quærat, uterius: quare veritas est conformis naturæ rationali quâ tali? non debet dari ulterior responsio, cum jam sit perventum ad universalissimam Regulam, quæ etiam (humano modo concipiendi) est respectu actuum Divinorum: sed debet declarari veritas esse conformis naturæ rationali per quosdam suos effectus v. g. quod hæc conservet mutuam societatem, & amabilem convictum inter homines, &c. Planè sicut dum quæritur: quid est homo? & Respondetur esse animal rationale. Ad ulteriorem quæstionem, quid sit animal rationale? Respondendum est per effectus rationalitatis & animalitatis, quæ sunt sensatio, discursus, &c. Datur autem conformitas hæc ad naturam rationalem quâ talem. Quia sicut cuilibet naturæ proprium est operari conformiter ad seipsam, v. g. Naturæ aquæ quâ tali est proprium frigescere & frigidificare: Naturæ ignis quâ tali proprium est esse calidum & calefacere &c. Ita & naturæ rationali qua tali proprium est conformiter operari ad seipsam, seu secundum dictamen rationis, per quod principalissimè differt ab omni alia natura irrationali.

Hinc *infertur* honestatem formalem tria importare. *imo*, actum Virtutis obiectivè conceptum. *2do*, conformitatem eisdem actus, nempe cum natura rationali, quod est quid *tertium*. Planè sicut relatio sive sit hæc quid rationis, sive quid reale, sive distinguatur à fundamento, sive non, importat tria, sine quibus concipi nequit Relatio, nempe fundamentum, ipsam relationem, & terminum, ad quem refertur fundamentum.

Cæterum, quia hæc natura rationalis, ad quam dicitur confor-

conformitatem actus moraliter bonus objectivè conceptus, sumitur pro Regula proxima morum, seu lumine aut dictamine naturalis rationis ipsius, sive præcisè in se spectato, sive insuper hoc dictamen proponat (ut incipiamus à notiori hominis operantis) aliam naturam rationalem à se numero distinctam, nempe aut Regulam primam morum, aut Legem humanam, aut Voluntatem Divinam humanamvè, aut Causam exemplarem, seu exemplar vitæ DEI, Christi, DEiparæ, Sanctorum: Exemplar namque Ita suarez cum est forma, quam effectus imitatur, ex intentione agentis, qui determinat si aliis Metaph. bi finem: Ideo actus objectivus conformis ad dictam Regulam proximam morum præcisè, sive insuper ad supra specificatorum unum vel plura per rationem proposita, erit talis actus honestus seu moraliter bonus, ut ex supra dictis patet.

3^{to}. Causa formalis actuum vitæ spiritualis, quæ supernaturales & meritorii sunt, est Obiectum motivum eorundem actuum ut bonorum moraliter, quatenus Revelatum & Creditum: Quoad supernaturalitatem Ratio est; quia sicut ille actus moraliter bonus est naturalis, qui specificatur ab obiecto moraliter bono per solas vires luminis naturalis proposito, ut patet in infideli, qui elicit actum fidei naturalis in aliqua materia bonum propter veracitatem DEI, & propter honestatem hujus actus naturæ viribus cognitam; velamat DEUM propter suam bonitatem, & honestatem hujus actus naturaliter perspectam: Ita ille actus moraliter bonus erit supernaturalis, qui speciem suam accipit ab obiecto supernaturali, Divina revelatione affecto, & per lumen supernaturale fidei proposito: quandoquidem talis nimirum & motivo directo supernaturalis Revelationis, & motivo indirecto Apprehensionis, judicii per fidem supernaturalem: v. 9. s. I. n. 18. g. Actus, quo diligo temperantiam, ideo quia DEUS revelavit eam esse honestam, eamquæ ut talem credo & diligo, erit actus supernaturalis temperantiæ: quia motivum obiectum est supernaturale: iam verò à qualitate motivi qualificatur in sua specie actus, ut mox videbimus. Hinc scriptura dicit, quòd Iusti per fidem devicerunt regna, operati sunt justitiam, adepti sunt repositiones: Ubi dum loquitur de operibus justitiæ supernaturalibus, eorum causam formalem in ratione obiecti motivi assignat fidem supernaturalem hac particula Ly Per.

Vide Card Lu-
go de fide disp.
& seq.

Hebr. II.

Vide Card. Lu-

go de fide disp.

12. sect. 3. n. 45.

Deinde quod concernit meritorios actus, Ratio est: Quia multi asserunt opera ut sint meritoria debere referri in DEUM, & fieri propter DEUM. Illi ergo actus quales sunt moralium virtutum, qui non habent pro motivo DEUM, quomodo fient propter DEUM? Respondetur: Nimirum etsi per imperium charitatis non referantur in DEUM, requiritur tamen aliqua eorum ordinatio in DEUM, seu ut habeant aliquo modo DEUM ex parte motivi objecti. Hoc enim ad minus videntur exigere ad rationem meriti Patres, dum exigunt ad meritum, quod opera fiant propter DEUM: id est in nomine seu cum memoria DEI &c. Jam verò DEUS aliquo modo habetur ex parte motivi objecti, in Deumquē refertur opus, quando homo ex fide movetur ad illud opus faciendum, jam enim amplectitur illud objectum, quia DEUS revelat esse amplectendum, atque adeò in actu exercito videtur obedire regulæ seu consilio DEI. Sicut eligens viam ex consilio amici, videtur referre illud opus ad amicum eiquē obedire, ac in nomine ejus facere, etsi id non faciat propter bonum amici, sed propter utilitatem ipsius operis, quam amicus approbat. Sic dans calicem aquæ frigidæ propter dictum Christi, dat illum in nomine seu in verbo Christi; id est præstando fidem verbo Christi illud consulentis & præcipientis: quare in actu exercito honorat DEUM, approbando re ipsa, & sequendo ejus consilia propter ipsius auctoritatem, quam ut vidimus aliquo modo habet ex parte motivi.

Hæc autem Relatio in DEUM requiritur ad omne meritum tam congruum, quam condignum in ordine ad vitam æternam. Quia omnia merita opus est ut proveniant ex fide, prout fatentur Sancti Patres, & modus loquendi sacræ Scripturæ: In quo sensu Paulus sæpè insinuat hominem non justificari ex operibus, sed ex fide, ubi non solum loquitur de prima justificatione, sed & de secunda.

Ita Card. Lugo

de fide disp. 9.

sect. 1. n. 20.

Et quanquam objectum motivum fidei possit terminare actum naturalem, defacto tamen intellectus non elicit regulariter nisi assensum supernaturalem. Quia cum DEUS defacto voluerit fidem esse principium meriti supernaturalis tum de congruo, tum de condigno: Justus enim ex fide vivit: Hinc

propo-

proposito sufficienter motivo fidei, DEUS non concurrir ad actum naturalem sed supernaturalem meritorium vitæ æternæ.

Deinde etsi homo Christianus quandoque possit non operari ex motivo fidei, id tamen defacto vix aut nunquam contingere. Ratio hujus est, quia ea est intellectus natura, ut ob vitandum periculum falsitatis suos actus mensuret ad certiores regulas, quas & voluntas consulit præ minus certis, dum inclinatur ad aliquam bonitatem. Jam verò hæc regula potissima & certissima est fides Christiana. Ergo secundum eandem ferè semper operantur fideles, quin etiam peccatores, dum honestè operantur circa materias omnium virtutum. Adeoque ferè semper operantur supernaturaliter etiam peccatores, fideles tamen. Quodsi contingat operari honestè non ex motivo supernaturali, erit opus meritorium naturale præmii naturalis.

*Ita Card. Lugo
disp. 12. sect. 3.
n. 47. de fi-*

4^{to}. Quæritur universaliter: An omne objectum materiale & formale motivum actuum vitæ spiritualis, eisdem cauent in ratione actuum moraliter bonorum, supernaturalium, meritoriorum? Ad quod Respondetur affirmative. Ratio hujus est, quia certa proportionem spectata, licet se habet materia & forma physica ad compositum physicum, ita se habet objectum materiale & formale ad actum. Atqui materia composito dat esse materiale, forma dat esse formale. Ergo & objectum materiale actui dabit esse materiale, objectum formale dabit esse formale: cum hac tamen differentia, quod materia & forma physica sint causæ compositi intrinsecæ; objectum verò materiale & formale actus sunt causæ extrinsecæ.

Deinde motus speciem sumit à termino. Atqui actus est motus, objectum est ejus terminus. Ergo actus speciem sumit ab objecto. Infero: Ergo quale erit objectum, talis erit & actus. Subsumo; sed objectum vitæ spiritualis motivum, ut supra vidimus, est moraliter bonum, supernaturale, effectivum meriti de condigno, vel de congruo. Ergo & actus vitæ spiritualis erunt moraliter boni, supernaturales, meritorii.

5^{to}. Qualem universaliter Objectum materiale & formale causalitatem exercent in actum? Respondetur: Objectum materiale non potest exercere aliam causalitatem, quam sibi propriam

*Arist. 2. Physic.
cap. 7*

propriam, nempe producendo intentionaliter esse materiale actus, nè plus videatur dare, quàm quod habet. Porro objecti formalis motivi respectu potentiae cognoscitivae est causalitas efficiens. Tum prout objectum movet imprimendo speciem, tum prout per speciem concurrit ad actum. Respectu verò potentiae appetitivae est causalitas finalis. Unde aliqui reducunt Objectum ad causam finalem; alii ad causam formalem extrinsecam: quia quidquid dat speciem, habet rationem formae: sed benè Aristoteles hæc componit dum dicit: *Finis & forma co-
incidunt in idem numero.*

6to. Ex dictis inferitur nos hic Causam formalem, seu objectum formale motivum Actuum vitae spiritualis sumere latius pro omni causa, quæ dat Esse formale dictis actibus, sive sit Causa efficiens, propriè formalis, sive finalis: etsi de causa efficienti & finali sub alia ratione & respectu alibi tractemus.

7imo. Objectum Actuum vitae spiritualis hic maximè sumimus pro actu virtutis objectivè concepto: qui actus sive sit Fugæ, sive Prosecutionis, est utiquè conformis rationi naturali, tum Divinæ, ejusquè voluntati &c.

8avo. Objectum quandoquè sub una, quandoque sub pluribus rationibus motivi repræsentatur & concurrit ad actum salutarem: ut v. g. actus humilitatis exercendos movet Divina voluntas, movet Christi, Deiparæ humilitas, movet exaltatio in futura gloria &c. Deinde unum motivum subinde separatum ab altero, subinde conjunctum cum altero excitat; ut v. g. humiliari hominem & voluntati DEI placet, & eadem voluntas intendit in humilitate imitari Christum, Deiparam &c.

In hac parte secunda secundæ Theologiæ etsi Praxibus locus non esse accommodus videatur prout in prima secundæ, tamen quæ servire possunt ad praxim actuum salutarium in ratione eorum objecti hic breviter advertimus. Itaque triplex ratio bonitatis revelata & credita ponitur, propter quarum aliquam objectum seu actus virtutis objectivè conceptus in Praxi potest intendi, & ita supernaturalizari actus formalis.

Prima Ratio est Generica: dum scilicet sit fuga vel prosecutio alicujus actus, quem hic & nunc specie aliqua vitii vel virtutis titolare non potes, nisi prudenter videtur tibi quod ille
actus

actus si non in specie saltē in genere sit revelatus, ut malus vel bonus seu diffōrmis vel conformis rationi naturali, aut Divinæ, ejusquē voluntati, sive exemplari DEI, Christi, Deiparæ, &c. Vel, si non videtur tibi esse revelatus, sed tantū præcisē apparet esse conformis aut diffōrmis rationi naturali, Divinæ, vel ejus voluntati, &c. Adeoquē ut talis dicatur esse fugiendus, vel faciendus ex revelatione universalis principii apud Psalmistam: *Declina à malo, & fac bonum*: Talis inquam actus erit supernaturalis, & bonus, & meritorius, ut ex suprā dictis patet.

Secunda Ratio bonitatis revelatæ, est specifica: dum v. g. fugis actum homicidii sub ratione specifica injustitiæ, & odii: aut ponis animam tuam pro fratribus tuis sub ratione specifica fraternæ dilectionis: quia scilicet DEUS revelavit omnem injustitiam, & odium esse difforme, & charitatem fraternam esse conformem rationi naturali, vel Divinæ, ejusquē voluntati &c. Talis actus erit verè spiritualis.

Tertia Ratio bonitatis revelatæ, est atomæ seu ultime speciei: dum v. g. fugis homicidium, quia DEUS revelavit homicidium esse difforme rationi naturali &c. voluntati suæ, quā prohibet: *Non occides*. Vel dum moreris pro fratribus, quia DEUS revelavit esse conforme rationi &c. Exemplari Christo v. g. juxta quod Joannes dicit: *Quoniam ille (Christus) animam suam pro nobis posuit, & nos debemus pro fratribus animas ponere*. Ejusmodi actus erit supernaturalis. Et hæc sequenti Tractatu sub singulis §§. ad Praxes específicas accommoda, dum placet: simul etiam vide alia requisita ad actum salutarem, de quibus suprā in prima secundæ sufficienter egimus maximè Tract. I.

Exodo 20.

Joan. 3.

TRACTATUS.

De Causa Formali, & Exemplari actuum vitæ Christianæ seu Spiritualis in specie.

Hæc Causa Formalis cū sit multiplex, distinctis §§. de ea agendum.

§. I. mus.

Dico, Gratia actualis, & habitualis, habitus infusi virtutum, Dona Spiritus Sancti cum potentiis naturalibus sunt causa

causæ formales actuum vitæ spiritualis. Ratio est, quod dicta iisdem actibus dant Esse formale moralis bonitatis, super-
 1. 2. 4. § 4. 4. 2. naturalitatis, meriti: *Omne enim agens ut D. Thomas loquitur facit simile secundum speciem: hinc formæ adinvicem distinguuntur secundum diversa principia activa.*

§ 2dus.

Quoniam Regula intrinseca & proxima morum (quæ est Ratio propria operantis) est notior, illaque proponit alias Regulas extrinsecas & remotas morum, ideoque de ea hic primo agendum. Ratio itaque operantis dicitur *Regula morum proxima*, quatenus se conformans Primæ Regulæ morum sive habitualiter sive actualiter, mensurat rectitudinem, seu convenientiam actionum ad finem naturæ rationali convenientem.

Item dicitur *Lumen naturæ, seu naturalis rationis*, ita dictum; quod sicut lumen oculorum est corpori ad ipsius bonum, ita lumen rationis est animi ad ipsius commodum & emolumentum.
 Psalm. 4. Unde Psalm: dicitur. *Multi dicunt, quis ostendit nobis bona?* nempe bona convenientia naturæ rationali, qualia sunt Finis ultimus & media ad ipsum. Respondet Plates: *Signatum est super nos Lumen vultus tui Domine*; insinuans hoc lumen esse, quod ostendat nobis prædicta bona. Sicut de facto hoc solo lumine fulti devenerunt in notitiam summi Boni, & virtutum, illi antiqui Philosophi, de quibus Apostolus. Quanquam ad perfectiorem notitiam ejusdem summi Boni debet juvari supernaturali Lumine Fidei & gratiæ lumen naturale. Item dicitur *Lex* pro-
 Rom. 1. ut Apost. ad Rom. ait: *Gentes, quæ legem (scriptam) non habent, naturaliter quæ legis sunt, faciunt.* Ejusmodi enim legem non habentes, ipsi sibi sunt lex, qui ostendunt opus legis scriptum in cordibus suis.
 Rom. 2. Item dicitur: *Impressio & participatio legis æternæ* quatenus DEUS ad similitudinem suæ legis æternæ talem indidit & inseruit vim & inclinationem naturæ nostræ, ex qua judicium simile Divino prodiret v. g. non esse mentiendum, veritas semper dicenda.

Item dicitur *Dictamen practicum rationis*, quatenus eadem lex naturæ rationali insita, ad ejus bonum & commodum aliquod dictat seu præscribit esse faciendum, aut omittendum.

Hinc

Hinc colligitur præfatum Lumen aut Legem naturæ consistere imò in potentia intellectûs, & in synderesi (ita ex græco dicta ab attentione & conservatione) seu virtute intellectûs practici una ex intellectualibus, quæ est habitus primorum principiorum practicus. Permanentiam enim significant ly *Signatum Lumen, Lex scripta in cordibus* &c. 2dò consistit in actu: cum iudicium seu dictamen rationis sit actus. Et ita definitur *Lex naturalis esse naturale rationis nostræ iudicium seu dictamen, quo per lumen* Ita Valentia *nobis ab æterna lege impressum & inditum evidenter cognoscimus ea esse cum aliis disp. facienda, quæ ita sunt rectis & naturæ nostræ consentanea, ut ea negligere 7. de Legibus sit deformis & naturæ repugnans; & contra, ea esse vitanda, quæ facere quæst. 4. p. 1. turpe sit, & naturæ rationali minimè congruum.*

Porro Actus legis naturæ aliquando versatur circa universalissimas propositiones, & principia inde monstrabilia seu per se nota: ut *Bonum est faciendum; Malum omittendum.* Aliquando versatur circa minus universales: ut *Quod tibi non vis fieri, alteri ne feceris*) ex universalissimis deductas per medium: *Quia hoc est bonum; vel quia contrarium huic est malum.* Aliquando adhuc circa minus universales ex universalissimis vel minus universalibus conclusas v. g. *Non rapere aliena: quia id tibi nolles fieri.* Jam verò quando circa particularem propositionem ex universalissimis vel minus universalibus deductam versatur præfatus Actus v. g. *Bonum est dare Eleemosynam: Quia velles tibi dari eleemosynam, si esses in tali statu hujus pauperis: Ergo des eleemosynam huic pauperi.* Talis actus vocatur *Conscientia*: etsi hæc latius quandoque pateat, dicitur quæ cordis scientia quæ judicatur aliquid hic & nunc agendum vel omittendum esse, aut fuisse, illudquæ dignum laude vel vituperio. Hinc ad Rom. dicitur: *Gentiles &c. ostendunt opus legis scriptum in cordibus suis, testimonium illis reddente conscientia ipsorum, & inter se invicem cogitationum accusantium aut etiam defendentium.* Est autem Conscientia alia *Recta vel certa*, quæ judicatur prudenter aliquid agendum, vel omittendum, juxta manifestam legem naturæ, aut DEI, aut Ecclesiæ. Alia *Probabilis*, dum circa actum innititur non levi, sed solidæ rationi, seu auctoritati aut opinioni Patrum & Doctorum: etsi pro parte contraria etiam habeantur aliorum auctoritates & rationes. Alia

Erronea, quæ imprudenter judicat & determinat aliquid esse quam sit in re v. g. esse peccatum mortale, cum sit veniale, vel nullum; atque operans contra hanc conscientiam peccat tali peccato, quale judicavit, etiam mortali, quamvis nullum sit; quia expresse agit contra dictamen rationis in re gravi. *Dubia* est, quæ media & anceps hæret inter utramque partem, an sit licitum, vel illicitum, nesciens modum & rationem prudenter se resolvendi ad praxim: Unde tali conscientia operans in materia gravi, peccat mortaliter; quia se exponit proximo periculo peccandi graviter. Secus est, si dubium prudenter deponat, & opereatur. *Alia Conscientia Perplexa est*, quæ utramque contradictionis partem judicat esse peccatum. Unde in tali Conscientia ex duobus malis minus eligendum, vel si æquè malum esse videtur, quod vult faciat, deposito affectu ad malum. Quia in tali casu deest libertas, necessaria ad rationem peccati. Et S. August. illa, ait, desinunt esse peccata, quæ propter graviora vitanda suscipiuntur. *Alia Scrupulosa est*, quæ ex levi ratione & indiciis judicat esse peccatum, ubi non est. *Alia Laxa*, quæ innixa levi fundamento, vel ex culpabili ignorantia non judicat esse peccatum, ubi verè est. *Alia est Mala*, in qua vivit peccatum poenitentiam non deletum, illam rodens, unde convellatur. Vermis eorum non morietur in hac vita, sed maxime in poenæ æternitate assiduus objurgationibus, expostulationibusquè erit animus crucians. *Pejor Conscientia est*, in qua dormitat peccatum, dum scilicet peccata vera pro scrupulis judicantur ex pravitate affectus, dumquè remorsus peccati quasi non sentitur: talisque Conscientia dicitur *Cauteriata*. *Pessima Conscientia*, in qua regnat peccatum, dum nempe peccator, cum in profundum venerit, contemnit: & latatur cum malè fecerit, & exultat in rebus pessimis. *Bona Conscientia est*, quæ firmum ac perenne propositum multis tentationibus probatum habet nunquam mortaliter peccandi: dicitur eadem *pura*, *casta*, *munda*, *timorata*, quia ex timore DEI cavet sordes peccati lethalis cum immundo spiritu, sed fidelis manet Sponsus suo Christo. *Conscientia melior*, quæ simile propositum habet non peccandi venialiter. *Optima*, dum non ex errore, aut pusillanimitate, sed humilitate ac cordis puritate agnoscit culpam ubi non est, ad ferendam

rendam scilicet poenam, & sustinendam confusionem ad Christi imitationem. Aliquando dicitur *Tenera, delicata*, dum minimo peccato aut imperfectione facile sentit se læsam, & fert non mediocriter, citiusquæ se per confusionem pectoris, aspirationem doloriferam, humilem precem expedit ab illa læsura. *Obdurata* verò nec terroribus poenarum inferni concutitur, nec blanditiis cælestium promissionum emollitur, sed omnia vel cum indignatione, vel cum cachinno respuit. Aliquando dicitur *Clara*, dum minimas maculas & imperfectiones in se intuetur. *Obscura* verò quæ pravis cupiditatibus cæca, rectum iudicium ferre non novit de gerendis ad suam salutem. Aliquando *Quieta* seu *pacata*, quæ non turbatur peccatis, vel scrupulis, & perplexitatibus, sicut è contra *Anxia* inquietatur. Aliquando *Perversa Conscientia* dicitur, cujus indicium est, ex malitia perversè iudicare bonum malum, & malum bonum. Item *Desperata*, quæ involuta sceleribus de misericordia DEI & sua salute æterna finaliter omnem spem deponit.

Hoc autem *Dictamen legis naturalis* est per se evidens: quando nritur principiis per se notis. Dixi per se evidens, nam per accidens potest fieri inevidens, vel propter aliquam malam dispositionem intellectûs in applicatione ad aliquod particulare operabile per errorem, pertinaciam, &c. Vel ob pravam affectum, consuetudinem voluntatis. Tales fuerunt illi, quos iuxta Apostolum, Tradidit DEUS in reprobum sensum, ut faciant ea, quæ non conveniunt, repletos omni iniquitate, malitiâ fornicatione, avaritiâ &c. Quia cum iustitiam DEI cognovissent, non intellexerunt, quoniam qui talia agunt, digni sunt morte. Quæ crimina ab eisdem reprobis non reputabantur pro peccatis, ut D. Thomas ex hoc loco insinuat. Imò quod magis stupendum est, publica legum auctoritate probabantur. Ita ut Theoderetus asserit lib. 9. de curandis affectionibus Græcorum, legibus Lycurgi permittēbatur pueros adamare, itemque viros ex alienis uxoriis, feminas autem ex alienis maritis sibi filios comparare: Et per leges Perlarum, Matrum, sororum, filiarumquæ connubiis suisque deque commisceri: Et per leges Tybarenorum, Seniores ab altissimis rupibus precipites dari: Et per leges Platonis, Communes habere uxores & filios, ita ut neque pater sciat, quem ex se filium progenuerit, neque item filius ex quo natus sit patre. Et alia ejusmodi infanda scelera. His suppositis.

Rom. I.

D. Thomas
lib. 2. quest.
94. art. 6.

Dico. Obiectum actuum supernaturalium revelatum & creditum, quod sit conforme dictamini practico luminis naturalis: atque ut tale intentum & volitum, est causa formalis actuum bonorum moraliter, supernaturalium, & meritoriorum vite aeternae. Probatur Assertio: Quia obiectum remotum, vel proximum (qui est actus obiectivè conceptus) quatenus est conforme dictamini luminis naturalis, cum tale obiectum sit honestum seu moraliter bonum, ut supra vidimus: sequitur quod ejusmodi obiectum sit causa formalis actus moraliter boni. Siquidem universaliter obiectum in Esse specifico constituit actum, ut supra vidimus: ubi suppone hæc intelligi non modò si illud obiectum ponatur cum adiectis hisce formalibus terminis, quia conforme rationi, vel honestum, verum etiam si adiciantur æquivalentes termini, uti illud: sic enim decet nos implere omnem iustitiam: ubi ly decet idem sonat quod conveniens est, honestum est. Vel si eadem convenientia rationi aut honestas aliunde per bonam consequentiam

Matth. c. 3. concludatur, ut si v. g. alicui obiecto annexæ sunt minæ, ideo ut fugiatur, uti: Neque fures, neque avari, neque ebriosi, neque maledici, neque rapaces regnum DEI possidebunt. Aut adjunctæ sunt

1. Cor. cap. 6. promissiones, ut illa virtus custodiatur: v. g. Beati, qui persecutionem patiuntur propter iustitiam, quoniam ipsorum est regnum celorum, Quippe conveniens est rationi illud cavere, quod ipsi noxium est, & sequi, quod proficuum: adeoque operans ex hoc motivo, honestè operatur. Si enim apud Philosophos ideo honestum est cavere mendacium, quia in ipso societatis humanæ bonum pessiundatur, multorumquè malorum est origo, quanto magis erit ideo honestum fugere mendacium apud Theologos Spirituales;

Matth. c. 5. quia os, quod mentitur occidit animam. Et sic de cæteris. Deniquè ratio honestatis reperitur in illo opere quod fit ex his motivis; quia scilicet illud opus v. g. iustitiæ est conforme legi DEI, & præcepto, voluntati DEI, vel legi & præcepto Ecclesiastico, aut Civili, vel exemplari vite DEI, aut Christi, aut DEI paræ, aut sanctorum: vel quia illud opus est effectivum Gloriæ DEI, Celitum, & tue &c. ut infra singulis paragraphis videbimus probando bonitatem morale inesse ejusmodi motivis. Quod verò ejusmodi obiectum ut revelatum & creditum sit causa quoque formalis actuum quatenus

quarenus supernaturalium & meritoriorum, supra etiam visum in genere.

Dicimus insuper, quod præfatum objectum debeat esse *intentum & volitum*. Tum ideo, ut non in sola speculatione hic sistatur, sed reducatur ad praxim id quod insinuat. Tum quia actus non erunt moraliter boni & meritorii, nisi adfuerit exercitium voluntatis, cujus actus elicitur sunt, intentio & volitio. Dicitur autem in assertione; *ut tale intentum & volitum*: id est intentum & volitum dictum objectum, ideo, quia est revelatum & creditum esse conforme dictamini luminis naturalis.

In Praxim hoc objectum actuum salutarium per conformitatem ad lumen rationis, uti & aliarum Regularum sequentium, accommodatur secundum supra dicta in genere n. 2. & sequentium in formula intentionis data 1. 2. c. 1. sect. 4. subsect. 1. §. 9. sub Circumstantia *Cur*: tum ibidem subsect. 2. tum hic sub praxi §. 7.

§. 3^{tius}.

Dico. Objectum actuum vite supernaturalis revelatum & creditum, quod sit conforme Legi æternæ seu primæ Regulæ morum, atq; ut tale intentum & volitum, esse causam formalem actuum moralium, supernaturalium, & meritoriorum. Ubi primò suppone nomine Legis æternæ qualicunque dictamen Divini intellectus & Sapientiæ de quocunque opere bono. Suppone secundò Legem DEI quamvis sit occulta innotescere tamen nobis tum per dictamen rationis nostræ, quod est impressio quædam legis æternæ; tum per revelationem Divinam quoad præcepta & consilia supernaturalia. Probatur Assertio quoad moralem bonitatem, quia si objectum seu actus objectivè conceptus sortitur bonitatem moralem per conformitatem ad dictamen Legis naturæ, multò magis eandem bonitatem fortietur per conformitatem ad dictamen Legis æternæ: quia in omni genere plus dependet effectus à Causa prima, quàm à causa secunda; siquidem virtus causæ secundæ derivatur à prima: in genere autem causæ exemplaris Lex æterna est causa prima, Lex naturæ est causa secunda: quia eatenus est bona, quatenus congruit cum Lege æterna. Quod atinet supernaturalitatem, & alias particulas assertionis, visum est supra in genere, tum §. 2do.

Vid. D. Thom.

1. 2. quest. 19.

art. 4.

Quoad

Quoad Praxim eadem vide notata, quæ sub Praxi præcedentis §. & §. 7. & hic proportionata methouo applica.

§. 4tus.

Dico imò. *Objectum actuum vitæ Christianæ revelatum & creditum, quod sit conforme Voluntati Divinæ, atq. ut tale intentum & volitum, est causa formalis actuum moraliter bonorum, supernaturalium, & meritoriorum.* Ratio de bonitate morali est: quia objectum ut est conforme voluntati Divinæ, ideo est bonum & rectum: quia attingit primam & propriam mensuram rectitudinis, nempe voluntatem DEI, ei se conformando. Unumquodque enim
V. D. Thom. 1. 2. quest. 19. art. 9. rectum & bonum est, inquantum attingit ad propriam mensuram. Quod verò voluntas DEI sit propria mensura objecti, seu actus humani objectivè concepti inde est, quia cum bonitas voluntatis ejusq. actuum dependeat ex intentione finis ultimi, seu summi Boni, quod est DEUS, summum autem Bonum primò & per se comparatur ad voluntatem Divinam, ut ejus proprium objectum: illud verò quod est primum in quolibet genere, est mensura & ratio omnium, quæ sunt illius generis; Sequitur voluntatem seu actum humanum tendentem in summum Bonum, debere mensurari voluntate Divina, cum ipsa sit prima in ratione mensuræ. Adeoque ad mensuram voluntatis Divinæ voluntas nostra in operando, & ipsa voluntas erit recta & bona, & ipsum opus rectum & bonum moraliter efficietur.

Particulæ reliquæ Asserti jam probatæ suprâ in genere & §. 2.

Quoniam verò voluntas DEI tale est objectum, ad quod & secundum quod omnis actio & passio vitæ Christianæ debet ordinari, omnisque finis supernaturalis intendi, ideo paulo fusiùs hoc in puncto agendum. Igitur:

Dico 2dò. *Voluntas DEI etsi una sit essentialiter in se indivisa, per respectum tamen ad modum nostrum concipiendi & operandi, juxta Spirituales Theologos triplex est dicente Apostolo: Ut probetis quæ sit voluntas DEI bona, & beneplacens, & perfecta.* Supra quæ verba
Rom. 12. **Lyranus in 12. commentator** Lyranus ait: Voluntas DEI (est bona) quoad incipientes;

pientes; (*beneplacens*) quoad proficientes (*perfecta*) quoad perfectos. Cui divisioni innixus quidam pius Author edidit præclarum libellum tunc tunc: *Regula perfectionis, compendiose redacta ad unicum punctum voluntatis Divine, & in tres partes distincta*. Ita Canfeld. Caquæ secundum hunc Authorem Voluntas DEI bona appellatur *puerina*. Exterior, beneplacens Interior, perfecta Essentialis sive Supereminens; de quibus in sequentibus.

Punctum I.

Voluntas DEI exterior, est Divinum beneplacitum, cognitum per legem, ac rationem: est norma omnium nostrarum cogitationum, verborum, & operum, in vita activa. Dico esse (Divinum beneplacitum) quia etiam si DEO nullus sit bonorum nostrorum operum usus teste Psalmista: *Quoniam bonorum meorum non eges*: neque quidquam perdat, vel lucratur ratione bene seu male à nobis gestorum; attamen ex immensa sua bonitate delectatur, eique placeat, quotiescunque bene agimus, ipsiusque præcepta observamus: ut ex adverso, ratione iustitiæ suæ ægrè fert, eique displicet, si quando ea transgredimur. Addo (*cognitum*) eò quod non solum beneplacitum, ac voluntatem habeat, sed etiam eandem nobis reddat manifestam, in quoniam ejusmodi ipsius voluntas beneplacitumque consistat, patefaciens. Dico (*per legem*) ea est enim, quæ nobis eandem voluntatem demonstrat, ac (*per legem* quidem in genere) non illam quæ solius DEI est tantummodò: ut cujuscunque generis bonas leges includamus, nempe legem DEI, de qua scriptum reperimus: *Si vis ad vitam ingredi, serva mandata*: ut & legem Ecclesiæ: Nam qui non vult audire Ecclesiam, fit tibi sicut Ethnicus & publicanus. Pari modo legem, regulam, constitutiones, & statuta sui ordinis, si Religiosus sit, prout hortatur Psalmista: *Vovete, & reddite Domino DEO vestro*. Similiter legem, vel mandata pastorum, præsulumque; cum dictum sit: *Obedite præpositis vestris, & subiacete eis*. Insuper legem sive constitutiones principum: ait enim Salvator: *Reddite quæ sunt Cæsaris, Cæsari*. Nec minus legem, seu præcepta parentum: juxta istud: *Honora Patrem tuum, & Matrem tuam*. Legem quoque magistratum: Etenim: *Non est potestas nisi à DEO*; & qui

Benedictus

Canfeld p. 1.

c. 5.

Psalm. 75.

Matth. 19.

Matth. 15.

Psalm. 75.

Heb. 10.

Luc. 20.

Rom. 13. ibid.

Eph. 6.

qui resistit potestati, DEI ordinationi resistit. Adhuc & legem & statuta patrum familias: de quibus scitum est illud: *Servi obedite Domino vestris*. Denique legem, quæ statui, gradui, ac conditioni uniuscujusquæ competit, congruitquæ, sive is superior sit, sive subditus, dominus, seu servus, conjugatus, vel non conjugatus, Ecclesiasticus, Religiosus, sive Laicus. Dico ibidem (*per rationem*) quod non sine causa adjicitur, quoniam in multis hæc DEI voluntas per legem cognosci nequit, cum sint complura legibus exempta, ad quæ inhibenda, vel imperanda illæ sese non extendant; qualia sunt v. g. Sacris ordinibus initiari, conjugio sese adstringere, sive cælibem vitam agere, iter arripere, aut domi moram facere, sedere, vel stare, loqui, sive tacere, & mille id genus alia indices obvia, è quibus utpote, nec indictis nec interdiktis, verum arbitrio cujusquæ derelictis voluntas DEI haud

Vide quoque facile queat elici, quibus casibus ad rationem pro solutione refugium habendum est: quo (*rationis*) vocabulo, innuitur discretio, pietas, & consilium. Quo pacto autem solutio à ratione petenda sit in ejusmodi rebus ambiguis sequentibus mox ostendetur. Ulterius Dico juxta Doctores; *Voluntatem DEI*

D. Thomas I. Regulam esse nostrarum voluntatum, cogitationum, verborum, & operum. Quemadmodum enim per normam materialem, sive amussim recta ducitur linea, perquæ eandem cujuscunque rei rectitudo vel curvitas examinatur; sic per hanc voluntatem DEI possumus totius vitæ nostræ cursum, necnon omnium intentionum, cogitationum, verborum, operumquæ nostrorum filum in directum ducere, ejusdemquæ ope addiscere, directanè sit intentio, an verò ratione devix alicujus intentionis deflectat. Deniquè Dico (*in activa vita*) quod non tantum complectitur actionem exteriorem, sed etiam interiorem intentionem, nequæ conversationem externam solummodo, sed & reformationem internam similiter.

Quodsi quærat, cur ei voluntatis exterioris nomen tribuam, cum etiam partem interiorem attingat, reformetquæ? Respondeo. Idcirco me facere, quod illa lumen suum ac directionem petat ab exteriore, videlicet à lege: itaque circa exteriora maximè versetur, dum in admittendo quicquam seu refugien-

fugiendo eandem legem sequitur: ut etiam propterea, quod etiam hæc quæ intentioni simam, amissimquæ adhibet, sit interior, non iniuriâ tamen exterior nuncupari potest: collata cum duobus aliis voluntatibus, quæ omni ex parte prorsus sunt interiores. Hæc *Canfeldius*.

Verum particulariùs opus est descendere ad notitiâ ejusdem voluntatis DEI: Et quidem si id fuerimus assecuti, nihil nobis felicius in hac vita contingere potest, quàm certiores reddi de voluntate DEI nostri. Hac quippe cognitâ, eiquæ se conformans plenè extatiatur, & quietatur animus, cum securus redditur se omnia agere & pati secundum voluntatis DEI beneplacitum: cum sic agere & pati, sicquæ vivere & mori, est ineffabiles, eosquæ intalibiles thesauros in æternitatem recondere, est gloriam Cælium ipsiusque DEI indubitanter promovere, gratisimum placitum, gustum, gaudium DEO suo facere, quæ cura unica, summa amatorum DEI est, hocquæ fine adepto istud exilium mutatum sibi in paradisum, & atrocibus licet pressuris exasperatam hanc vitam, refertam deliciis æstimant, & subinde sentiunt, amore complacentiæ de Gloria, placito, gustu, gaudio DEI sui amarissima quæquæ dulcorante. Hinc de ejusmodi beatis inquisitoribus suæ voluntatis DEUS loquitur: *Me etenim de die in diem quærunt, & scire vias meas volunt.* Et vir secundum cor DEI desiderio æstuaus ingeminat orans: *Doce me facere voluntatem tuam.* Et ipse Christus hoc quoquæ præcipuè nos orare præcepit: *Fiat voluntas tua sicut in Cælo & in terra.* Quare hinc in sequentibus ex citato *Benedicti Cabucino* afferemus Modos & Regulas cognoscendi eandem voluntatem DEI, juxta datam supra triplicem ejus distinctionem. Quantum quidem ad noscendam Exteriorem DEI voluntatem Regula est hujusmodi.

Quæcunque agenda, seu perferenda, admittenda, vel rejicienda occurrunt, seu corporalia illa sint, sive spiritualia, triplicis sunt generis: aut enim imperata sunt, aut prohibita, aut indifferentia; nec quidquam contingere potest, quod non uno ex his membris contineatur.

Ad primum igitur quod attinet, si præcipitur id, de quo 1. *In rebus im-*

Isai. 58.

Psalm. 142.

Mattb. 6.

Bened. Canfeld. 1 p. c. 7.

Regule cognoscendi voluntatem DEI.

disceptatio est, clarissimè liquet voluntas DEI, nempe ut fiat; oportet ergo ut illud exequamur, idquè juxta præfatam Regulam generalem, videlicet quia ita vult DEUS, omni alio sine timore.

**2. In rebus
prohibitis.**

Quod ad secundum; verò si res prohibeatur, voluntas DEI non minùs est manifesta, scilicet nè fiat, ideoquè omit- tendum, rejiciendumquè est, ob eandem voluntatis Divinæ in- tentionem: itidem aliis quibuscunque repulsis, & quoad fieri potest è memoria erasis.

**3. In rebus in-
differentibus.**

Quod autem ad tertium genus rerum indifferentium spectat; ea rursus in tres subdividuntur species, aliis enim na- tura vel sensus delectatur, ut curiositatis plenos discursus, res- què novas audire, decoras quorundam species, ædificiorum lu- perbiam, idquè genus alia intueri: alias natura averfatur, ve- luti silentium sibi indicare, elemosynas largiri, jejunia non imperata observare: alias eadem æquali loco habet: quales sunt, hanc, vel illam viam ingredi, sedere, vel deambulare: Eade- mum omnia, ad quæ non magis quàm ad ipsorum opposita propendet.

Col. 3.

Rom. 8.

Si igitur quod occurrit, ad primum genus rerum, quæ sensui vel affectui sunt grata spectet, voluntatem DEI peracturis reiiciendum erit: si ad secundum pertineat, sensuiquè adver- setur, amplectendum; quas duas propositiones sacrae literæ con- firmant, quæ singulis prope paginis nos ad veteris hominis mortificationem hortantur, ut: *Mortificate membra vestra, quæ sunt super terram. Et: si autem spiritu facta carnis mortificaveritis, vi- vetis.* Hæc tamen interponenda est cautela; ut an vera & non ficta discretio contrarium non requirat, observetur; ratione habita sanitatis, personæ, temporis, loci, similiumquè circum- stantiarum. Quod si ejusmodi sint circumstantiæ & rationes

**4. In rebus
ambiguis quid
agendum.**

utrinque tam ambiguae, ut revera utra partiam eligenda sit ignoretur, agendumvè an omitendum, resistendumvè sit, an consentiendum: tum alterutram partem expedite præstat as- sumere (comitante semper prædicta voluntatis DEI intentione) quàm non sinè multa distractione, cerebri perturbatione, ac temporis jactura longam deliberationem instituere, nisi for-
san

san (quod non frequenter evenit) tanti fuerit momenti res, ut 5. In rebus
id mereatur: quo casu ad preces, & piorum hominum, ac do- magni momen-
ctrinâ, iudicioquè pollentium consilia recurrendum est. ti.

Sin autem tertii generis sit res, videlicet indifferens, & neq; ju- 6.
cundum sit neq; asperum sensui, eam seu facere, seu relinquere, fas
erit in quam libuerit parrem se flectere, præsupposita semper hac
voluntate DEI, hoc vel simili modo eum ex animo compellan-
do: *Faciam vel acceptabo, omittam, vel recusabo istud, quia tua est vo-*
luntas; quo facto, quod alioquin indifferens erat, æquè erit vo-
luntas DEI, quàm quæ imperata sunt, vel inhibita. Cujus ra-
tio est, quia intentionem sequitur opus adeò, ut quæ ex senec
præcepta, nec interdicta sunt: ea bonitatem vel perversitatem
ab intentionis qualitate recipiant.

Quod ut facilis intelligatur, animadvertendum est eo-
dem modo, quo fructus alicujus arboris tam parvi, quàm ma-
gni ad Dominum pertinent sic: & fructus omnes operum,
verborum, ac cogitationum ad Dominum DEUM spectare:
Ideoque nihil omnino à quoquam fieri debet, quantumvis exi-
guum, tam admitiendo, quàm rejiciendo, consentiendo, resi-
stendo, agendo, & patiando, quod ad ipsum non dirigatur, &
ad illius gloriam tendat hortante Apostolo: *Omne quodcumquè fa-*
citis in verbo, aut in opere, omnia in nomine Domini nostri JESU Chri-
sti facite.

Col. 3.

Deniquè eæ actiones sunt voluntas DEI, in quibus inten-
tio DEI cum ea, quæ hominis est, coincidit: atqui in rebus in-
differentibus cum simili intentionis directione peractis, una
eademquè est DEI, hominisquè intentio, ipsius videlicet glo-
ria: ergo quotiescunque in his actionibus indifferentibus ita
dirigitur intentio, ea sunt voluntas DEI. *Hæc Causfeldius.*

Punctum II,

Voluntas DEI interior, est Divinum beneplacitum, per perfe- Benedictus
ctam, manifestam, atquè experimentalem notitiam interiorem cognitum; Causfeld. p. 2.
animamquè in vita interiore, seu contemplativa illustrans: nimirum cum cap. I.
illa in DEO intuetur & contemplatur, intimequè experitur, persentiscit,

atque degustat Divinam voluntatem, quæ est voluptas illa, atque oblectatio, quam DEUS concipit è re tali vel tali exequenda.

Quæ voluntas, beneplacitum, atque oblectatio Divina, tantas animæ, eam perfectè degustanti confert delicias: tantamque jucunditatem, ut eam ita attrahat, illuminet, dilatat, extendat, elevet, rapiat, atque inebriet; ut nullam post hac voluntatem, affectionem, aut inclinationem propriam persentiscat: verùm se ipsa penitus exuta, voluntate, jure, commodoque proprio prorsus exspoliata, in voluntatis hujus profundissimo oceano immergitur, atque in abyssi ejusdem voluptate absorbetur, & ita unus cum DEO spiritus efficitur.

In hoc autem voluntas interior ab exteriorè disfidet, quòd hæc ab extrinseco lumen suum hauriat, illa verò ab intrinseco: id est, quòd exterior per ea, quæ externa sunt, cognoscatur, ut sunt DEI, Ecclesiæ ac Prælatorum præcepta, consuetudinesque &c.

Interior contra, per internas nimirum inspirationes, illuminationes, elevationes, Deique attractiones: una in creaturis cernitur: altera in ipsomet Creatore perspicitur: uni res corporeæ, vel earundem imagines umbram obducunt: alteri nihil officit, quo minus propalam in Spiritu, & veritate dilucidissimè perspiciatur: una secum involvit res accidentarias; altera est pene tota essentialis: una simul & medullâ constat, & cortice, externo videlicet pariter & interno: altera autem solùm interno

Benedictus à Porro hujus Divinæ voluntatis in contemplativa vita manifestatio, aliquot gradibus à laudato Authore fusiùs describitur, quos ejusmodi illustrat similitudine dicens: Pater voluntatem hanc interiorem, non simul totam sed paulatim, ac

Canfeld. 2. p. 6.

per gradus advenire: sine qua anima non ab similibus mundo nocturnis tenebris undiquè referto, atque adoperto: voluntas verò illa diurno soli par, quo exoriente diffugiunt tenebræ, ac mundus effulgescit. Verùm uti dies non totus simul, sed pederentim illucescit, sic & hæc voluntas sese per intervalla exhibet.

I. Gradus.

Quemadmodum enim sub crepusculum matutinum sese dies nonnihil exerit, ita quoque hæc voluntas in principio puræ intentionis. Postmodum subintrat aurora, quæ evi-

denter

denter diem illuxisse demonstrat; cui manifestationis gradus potest æquiparari, quæ pari modo voluntatem Divinam animæ effulsisse ostendit. Tum sol oriri incipit, ac majorem lucis copiam mundo impertitur, nobisque admirationis gradum ob oculos ponit: in quo penitus anima in hanc voluntatem ingreditur, magisque illustratur. Deinde Sol nocturnas omnes tenebras in fugam dat; quod humiliationis gradum designat, in quo per summam illam sui exanitionem, atque annihilationem essentialiter magis quis hanc DEI voluntatem discernit, quæ ipsi perfecte unita, universas animæ tenebras dissipat, atque abigit. Non ita multo post Sol tantum præ se fert fulgoris ac splendoris, ut corruscantibus suis radiis creaturas tam ratione præditas, quam privatas exhilaret: hocque gradui exultationis quadrat, ubi hæc voluntas adeo se spectabilem atque admirabilem præbet, ut in homine non minus partem rationis partecipem, quam expertem oblectet. Novissime omnium Sol adeo in sublime gyrat, cælumque adeo sudum redditur ac ferenum, ut mundus velut ex abyſſo nocturnarum tenebrarum erutus, extollatur, ad cellissimum culmen rutilantissimi luminis, & claritatis meridianæ: quod Elevationis gradum indicat, hac voluntate demum tantum splendidæ lucis, ac lucidi splendoris advehente ut anima è gurgite tenebrarum extrahatur ad perfectam contemplationem DEI veri Solis, quo indutam uti mulierem illam in Apocalypſi, & amictam lumine sicut vestimento Angeli suspiciunt ac demirantur ingeminantes: *Quæ est ista quæ progreditur, sicut aurora consurgens, pulchra ut luna, electa ut sol, terribilis ut castrorum acies ordinata?*

Nora etiam, eſſi dicamus sentiendam eſſe in ſe, ac deguſtandam voluntatem, beneplacitumque Divinum, non oportere tamen ei ſenſui immorari, quantumvis propriæ voluntatis abnegationi, ac voluntati DEI innixi: licet enim præclarum admodum ſit, in ſui abrenunciatione & voluntate Divina oblectari, haudquaquam tamen in ejusmodi oblectamento quieſcendum eſt, at in ipſamet DEI voluntate.

Ubi obſervandum occurrit in actu illo abnegationis duo reperiri, renunciationem, ac delectationem: quarum priori inſiſten-

2. Gradus.

3. Gradus.

4. Gradus.

5. Gradus.

6. Gradus.

Apoc. 21.

Cant. 6.

Benedictus
Canſeld. p. 2.
cap. 7.

insistendum est, non autem posteriori. Pari modo & in actu resignationis voluntati Divinæ habentur duo, ipsamet resignatio, & quæ ex ipsa profluit voluptas; quarum illi est inhærendum; isti non acquiescendum.

Atque hoc punctum minùs observatum, & fallacia hæc non detecta effecit, ut complures mihi noti plurimùm fuerint hallucinati, idque eo magis quo hic error erat subtilior, ac specioso abnegationis vel resignationis prætextu obvelatus.

Postremò nemo sibi persuadeat posse ad hanc secundam partem deveniri, absquè prævia, diligenti debitaquè primæ partis exercitatione per veras, diutinasquè mortificationes. *Hæc Canfeldius.*

Punctum III.

Benedictus à Canfeld. p. 3. cap. I. Voluntas DEI Essentialis, est omnimodè spiritus & vita abstracta penitus, ac ex se pura, omnibusquè omnium rerum creaturarum formis exuta & denudata, seu corporales eæ sint, sive spirituales, temporis subiecta, seu æternæ; neque sensu ullo judicio, aut humana ratione apprehenditur: sed captum omnem, conceptumquè hominum transcendit. Si quidem nihil est ab ipsomet DEO distinctum, & nec est quid à DEO separatum, nec aliquid cum eo conjunctum aut unitum, sed ipsemet præcisè DEUS, atque ipsissima ejus essentia. Etenim hæc voluntas cum in DEO sit, sequitur eam DEUM esse, quia in DEO nihil est, quod non sit DEUS.

Differentia inter voluntatem interiorē & essentialē. Porro inter voluntatem interiorē & essentialē hæc intervenit discrepantia, quod una præcedat, altera subsequatur: una medium est, altera finis: una interior, altera intima; una rem & essentialē unitiva, altera transformativa: una penè essentialis, altera penitus; una quasdam habet imagines, licet admodum subtiles, altera prorsus nuda est, & omnium experts formarum; in una adhuc aliquid operatur anima, etsi perquam secretè; in altera est omnino otiosa: in una est activa quodammodo vel agens, in altera passiva seu patiens, utpote quæ in actionem, intimamvè DEI operationem in se recipit: Denique uti interior voluntas è prima, quæ exterior est, nascitur, ita essentialis ex secunda, quæ interior est, confurgit. *Hucusque Canfeldius.*

Porro

Porro adverte ejusmodi distinctionem voluntatis Divinæ à citato Authore factam, esse secundum triplicem gradum Contemplationis Divinæ à nobis supra sub Contemplatione descriptum: ubi in primo gradu sub formis corporalibus, in secundo sub formis spiritualibus, in tertio sine ullis formis Deus ejusquæ superbenedicta voluntas perspicitur, & cognoscitur, maxime in tertio gradu sensu quodam spirituali, & experientiali. De quo, & multa alia ad Contemplationem servientia vide fusissimè apud eundem Authorem.

De Praxi eadem Nota, quæ sub Praxi §. 2. & §. 7. & hic congruo modo adhibe.

§. 5tus.

Dico. Objectum actuum vite spiritualis, ut conformæ Legi aut præcepto humano, quatenus dependenti, revelatâ & creditâ dependentiâ, à Lege & voluntate Divina, atque ut tale intentum & volitum, est causa formalis actuum bonorum, supernaturalium, & meritoriorum.

Probaturs de bonitate, & supernaturalitate Objecti. De bonitate quidem: Quia conformari objectum legi humanæ, ut dependenti à Lege, & voluntate Divina, est conformari Legi & voluntati Divinæ, relucendi in Lege & voluntate humana, tanquam in suo medio. Legislatores enim seu superiores Ecclesiastici ex intentione finis supernaturalis sunt mediatores inter DEUM & hominem, functi legatione pro Christo, Divinam denunciante voluntatem, ejusquæ interpretes. Atqui conformari objectum Legi & voluntati Divinæ, tale objectum est bonum, ut supra est probatum. Ergo conformari objectum Legi & voluntati humanæ dependenti à Divina, est tale objectum bonum. Illa namque Lex & voluntas humana, est moraliter Divina. Dicit quippe Christus Luc. 10. *Qui vos audit, me audit.* Sicut Legatus gerit moraliter personam, vocem, judicium, & voluntatem sui Principalis. Quod etiam dicendum de Lege & præcepto Civili, (etsi ordinetur in finem naturalem) ut dependente à Lege & voluntate DEI Authoris naturæ. Quia ita quoque objectum conformatum Legi humanæ, conformatur etiam Divinæ, adeoque est bonum.

§ 3. & 4.

Luc. 10.

Quantum verò ad supernaturalitatem objecti præfati, inde cognoscitur: Quia Revelatio, & fides Divina, cadens suprà dependentiam objecti & legis humanæ à Divina, propter essentialē connexionem necessariò cadit suprà illud objectum & legem humanam, ut dependentem à Divina, atque quā talem id est dependentem repræsentat fides intellectui, ut revelatam à DEO, adeoque supernaturalem. Hinc universaliter de legibus, & præceptis maximè Ecclesiæ revelatum crediuit: *Qui vos audit, me audit.* Et illud: *Non est potestas (adeoque & Civilis) nisi à DEO: quæ autem sunt à DEO ordinata sunt.* Itaque qui resistit potestati, DEI ordinationi resistit adeoque potestati resistit DEI. Reliqua probanda suppleantur ex probatione suprà data in genere & § 2do.

Luc. 10.

Rom. 13.

Quod concernit Praxim, ea facienda juxta dicta sub Praxi §. 2. & § 7.

§. 6tus.

Dico. Objectum actuum vitæ spiritualis revelatum & creditum, quòd sit conforme Primo exemplari DEO; atque ut tale intentum, est causa formalis actuum bonorum, supernaturalium, meritoriorum. Probatur de bonitate, & supernaturalitate hujusmodi objecti. Quo ad bonitatem Quia ut D. Thomas ex August. dicit: *Oportet, quòd anima aliquid sequatur ad hoc, ut ei possit virtus innasci, & hoc DEUS est: quem si sequimur, bene vivimus.* Patet igitur quòd exemplar humanæ virtutis in DEO præexistat, sicut etiam in eo præexistunt omnium rerum rationes. Unde quædam virtutes vocantur Purgatorie, nempe hominum assequentium Divinam similitudinem. Ratio verò est, quia eo melior, & perfectior imago est, quo fuerit conformior in similitudine suo Prototypo. Ergo & animus ad imaginem DEI creatus tantò maiorem fortietur nobilitatem, quo in donis gratuitis ampliorem DEI retulerit similitudinem.

Quod concernit supernaturalitatem præfati objecti: ejus ratio patet ex suprà dictis; & fundatur in revelatione Divina, quā Christus nos docuit, debere nos habere pro Exemplari perfectionis nostræ, perfectionem DEI, dum dicit: *Estote ergo & vos perfecti, sicut Pater vester celestis perfectus est.* Reliqua vide suprà in genere & § 2.

Matt. 5.

De

De Praxi vide *suprà* specificata sub Praxi § 2. & § 7. & *hic* convenienter applica.

§ 7^{timus}.

Dico. *Objectum actuum vitæ Christianæ revelatum & creditum, quod sit conforme Exemplari Divino-Humano seu Christo, petissimum crucifixo, illudquæ ut tale intentum, est causa formalis actuum bonorum, supernaturalium, meritoriorum.*

Explicatur *In*, quomodo se habeat id exemplar Vitæ Christi in ordine ad actus vitæ Christianæ. D. Bonaventura ad-
vertit in Christo duplicem rationem exemplaritatis, æternæ videlicet & temporalis. Æternæ, secundum quod in ipso quatenus in Verbo Patris & speculo sine macula exemplariter cuncta creata relucet, quæ à principio conditionis mundi usque in finem ad perfectionem Universi totius tam spiritualiter, quam sensibilibiter producuntur. In quantum autem Verbum incarnatum in assumptæ humanitatis conversatione, exemplum & speculum est omnium gratiarum & virtutum & meritorum militanti Ecclesiæ. Et quemadmodum ab illo uno æterno exemplari indiviso tam diversæ manant creaturarum naturæ, & naturarum perfectiones secundum variam ipsius summi Boni participationem, quod perfectè ab una aliqua creatura capi non poterat, propter quod & diversitas constituit DEUS rerum species ad Universi completionem: sic & à Verbo illo incarnato, tanquam ab originali principio gratiæ, de cuius plenitudine accepimus omnes, & tanquam à speculo in quo & à quo omnis sanctitatis & sapientiæ plenitudo, & pulchritudo refulget, diversi status, & gradus, & ordines secundum variam distributionem donorum, & varium imitandi modum exemplariter derivantur: in quibus secundum multiformem participationem multimoda Christi perfectio sic distribuitur, ut simul reperiatur in omnibus, nec tamen in aliquo uno solo secundum omnimodæ plenitudinis totalitatem refulgeat, sed quilibet gradus & status pro suæ mensuræ modulo secundum plus & minus illiusmodi exemplaris influentiam suscipit, & ad ipsius imitationem accedit. Refulgent autem à Christo, tanquam à totius nostræ salutis exem-

In Apologia

Pauperum Resp.

I. cap. 2.

tis exemplari & originali principio actus multiformes. Nam quidam actus in iplo respiciunt *sublimitatem Potentie*, ut super aquas siccis pedibus ambulare, elementa convertere, seipsum transfigurare, & certa miracula facere. Quidam *Sapientie lucem*, ut arcana cælestia referre, secreta cordium scrutari, & futura prædicere. Quidam *severitatem judicii*, sicut vendentes ejicere de templo, cathedras vendentium columbas evertere, & dura increpatione ferire Pontifices. Quidam *officii dignitatem*, ut Sacramentum conficere sacratissimi corporis sui, manus imponere, & relaxare peccata. Quidam *condescensionem miserie*, ut latere in persecutione, trepidare & contristari in morte, & pro amore calicis Patrem rogare. Quidam *informationem vitæ perfectæ*, ut paupertatem servare, virginitatem custodire, DEO & hominibus seipsum subicere, noctes in oratione pervigiles ducere, pro crucifixoribus exorare &c. Cum igitur sex sint hujusmodi actuum varietates, in his ultimis duntaxat ipsum imitari est perfectum. Nam in his quæ sunt excellentiæ singularis, est impium & Luciferianum, nisi fuerit alicui, privilegi singularis dono concessum. In his autem quæ sunt severitatis & dignitatis, est præsentium & prælatorum. In his quæ condescensionis, est infirmorum, in quantum loquimur ad actum extrinsecum. Nequaquam igitur summa Christianæ perfectionis consistit in universali imitatione actuum Christi, sed tantum illorum, qui vitæ perfectæ imitationem respiciunt. *Hactenus Doctor Seraphicus.*

Probatur jam ima pars asserti de bonitate eaquæ supernaturali obiecti vitæ spiritualis per conformitatem ad exemplar
Vide in summa vitæ Christi: quia quod est primum & maximum in unoquoque genere, est mensura & exemplar cæterorum, Illiquè exemplari quo fuerit exemplatum conformius, eo erit melius & perfectius, quia majorem sui exemplaris exprimet perfectionem & similitudinem. Atqui Christus in ordine supernaturalium est primus & maximus omnium prædestinatorum. Ergo est mensura & exemplar omnium prædestinatorum. Exemplar inquam & imago tam actuum meritoriorum gloriæ, quam ipsius gloriæ, ut explicant interpretes per illa verba Apostoli:

Quos

Quos præcivit & prædestinavit conformes fieri imaginis Filii sui, ut sit ipse primogenitus in multis Fratribus. Adeoque accessus propinquior ad imitationem imaginis Vitæ Christi erit melior, & perfectior, isquæ supernaturalis: si innitatur revelationi Christi dicentis: Qui sequitur me, non ambulat in tenebris, sed habebit lumen vitæ in præsentem per gratiam, in futuro per gloriam. Atqui Lumen vitæ est supernaturale. Ergo & medium ad illud, id est sequela Christi, erit supernaturale. Et S. Hieronymus dicit, quod con- S. Hieronymus
temnere divitias commune sit etiam infidelibus, sed sequi Chri- lib. 3. in Matt.
stum est proprium Apostolorum, atque credentium)) Cætera c. 19.
in assertione posita declaranda & deducenda sunt ex supra dictis.

His suppositis, placuit hic adnectere magis particularia imitationis Christi, quæ ad tria principia reducuntur, ut scilicet imitemur Christum maximè passum & crucifixum 1. Perferendo exterius in corpore crucem seu varias poenalitates. 2. Sustinendo interiùs angustias animi. 3. Amando & gaudendo in Spiritu. Sicut & Christus hæc expertus est. In quo puncto porrigo quendam Authorem Anonymum, ut ex scriptis ejus patet, non Ex Margarita
inexpertum Mysticæ Theologiæ. Qui ita disserit inquit: Evangelica seu
Quisquis autem, ut ea quæ iam dicta sunt, (mystica & Divina) incomparabili
& quæ postmodum dicentur, in se ipso felicitet experiri, & ad Thesauro Divi.
ea pertingere voluerit (quod certè nulli denegatur facienti ne Sapiencie
quod in se est, & voluntatem ac diligentiam suam adhibenti) Lib. 1. c. 36.
seipsum expedire, ac nudare debet ab omni illo quod D E U S
non est, & convertere se totis viribus & omni conatu ad exerci-
tium Dominicæ Passionis, eamquæ adeò vigorosè attrahere
ad sentiendum eam ab intra, donec omnes sensuum evagationes inibi colligantur, stabilianturquæ, ita ut ubicunque sive stet,
sive ambulet, iugiter ob oculos suos quasi speculum, & in senti-
mento cordis sui tanquam fundamentum quoddam fixam ac
stabilitam habeat amorosam vitam ac passionem Domini I E S U
Christi, cui perpetuò inhærere velit ad construendum desuper
virtutes vniuersas. Nemo enim tam sublimiter proficit, quin
ad eam recursum habere debeat: nec quisquam ita debet ex-
tra verti & occupari, quin isti adhæreat fundamento, si modò
velit grata esse DEO & accepta opera sua. Imò si quis est a-
deò

dedo exercitatus, quod per lumen gratiæ raperetur extra suum ipsius naturale Lumen, & seipsum quasi in Lumine gratiæ perdidisset, atque in divitiis DEI absorptus esset, quando nihilominus, sibi ipsi restituitur, istud fundamentum primum ac præcipuum est obiectum ipsius, atque sentimentum quod in seipso recipit, & cui iugiter inhæret.

Isto igitur fundamento taliter in corde iacto ac stabilito, adhuc magis internum exercitium requiritur poenarum, videlicet ac dolorum, quos in sanctissima anima sua Christus sustinuit. Quod tantò melius est, atque utilius quantò aurum cupro præstantius est. Non enim sufficerent vel mille corda dolores, quos in anima sua Christus sustinuit, plenè cogitare. Istos verò dolores adeò vigorose interius exercere debemus, doneceos in anima nostra sentiamus, & in eis stabiliamur. Sed & tunc adhuc magis introverti debemus ad contemplandum amorem & gaudium Spiritûs, in quibus erat mens Christi, & extra quæ nec ad momentum recedebat: quod exercitium tantò est supra dictis nobilius ac præstantius, quantò Cælum melius est terrâ, Amor etenim ille & gaudium illud tam ingens erat ob felicem contemplationem gloriæ Paternarum divitiarum, ad quam perducturus erat animas nostras. Amor (inquam) eius ad nos tantus erat, quod usque ad extremum iudicii diem in illo mœrore ac poenalitate corporis sui permanisset suspensus potius, quàm permisisset unam saltem animam ab illis gaudiis ac æterna felicitate quantum in ipso fuit, separari ac perire. Porro amorem istum & gaudium istud continuè in spiritu nostro exercere debemus, donece in spiritu & mente nostra sentiamus, & anima langueat præ doloroso mœrore, & corpus crucifigatur, ac moriatur omni sensualitati, & spiritus hoc modo capiatur, atque in DEO ligetur ad perenniter cum ipso permanendum.

Tunc demum ultimo Fini suo appropinquat homo, in quo vera perfectio consistit, ubi de æterna veritate affecuratur, ubi DEUS seipsum largitur in viribus animæ, easquè facit DEI formes. Et sic homo in Christum IESUM transformatur, eique via DEI clarè ob oculos proponitur, & docetur qualiter

liter debeat interiùs & exteriùs conversari, & spiritum suum dirigere in intimum illud gaudium, & animam in tristitiam, & corpus in patientiam, & sensus subtus spineam coronam, & manus affixas virtuosis Christi operibus, & pedes ejus sacris vestigiis, & cor amoris iaculo transfixum habere, quatenus omnis vita sua, omnis amor suus, omnia desideria, cogitationes, verba, & opera DEUS sit; instruiturquè inibi quāter totum sit DEI, quicquid habet, quicquid amat, quicquid intelligit, ut sic ei vicissim applicetur in perpetuo amore, & per fidem, spem, atque charitatem modo sæpè dicto in ipso habitet, & ipse in illo. Quisquis enim in DEO taliter se exercet, eiusquè facit voluntatem, hunc ipse orantem libenter exaudit. Ille autem facit voluntatem ejus, qui sic Christum IESUM induit & imitatur, qui in exteriori homine suo, vulneratum Christi corpus induit, & tanquam fundamentum quoddam animæ suæ crucifixam imaginem imprescit, adeò ut ubicunque stet, sive eat, hanc iugiter in omni loco secum habeat, in ea sese exercens, & secundum eam dirigens tam interiorem, quàm exteriorem hominem suum. Inde nimirum humilis efficitur homo in conversatione sua, cum Dominum DEUM suum ita humiliter & verecundè cum multa morum honestate se viderit præcuntem. Justus quoque efficietur, cum in omnibus actibus suis IESUM sibi associaverit, & diligenter intuitus fuerit, qualiter ipse cuncta opera sua ad supremam gloriam Patris sui peregit, & quomodo semper in mente sublevatus extitit fervens & plenus amore ardentissimo in spiritu, subjectus & obediens in anima, & in corpore patientissimus. Verax quoque in verbis suis efficietur, si attentè consideraverit, quàm verâ & Divinâ sapientiâ plena erant omnia Christi verba. Patiens insuper erit in omni adversitate, paupertate, & despectione, si Christi poenalitatem, paupertatem, despectionem attenderit. Denique & sobrietas granum assequetur, attendens quòd ille qui cibus est Angelorum, sæpiùs etiam naturæ necessaria non habuit, & in morte sua felle & aceto potatus fuit. Et hoc modo semper in cordibus nostris sacrum illud speculum sine macula portare debemus, & hoc adeò vigorosè intrahere in omnia membra ac sensus nò-

sus nostros, ut neque oculi neque cor nostrum, quamvis alias imagines recipiant, per quas occupari, aut medium aliquod recipere, cor nostrum possit. Et sic nihil nos attingere poterit, nisi prius per hanc Crucifixi imaginem Christi ad nos perveniat, qui omnia membra nostra ac sensus nostros per se introduxit, per reparationem videlicet salutis nostræ, quiquè paratissimus est ad portandum unà nobiscum quicquid ejus causâ nobis acciderit, si nos ejus passionem intra nos portare studuerimus. Hoc igitur modo in corde nostro & in exteriori homine nostro imaginem Christi circumferre debemus. Porro in interiori homine, id est, in anima nostra gestare debemus illum incomprehensibilem amorem, quo anima Christi repleta erat, & per quem tot tamquè innumera bona operatus est. Porro in omnium intimissimo homine nostro id est in suprema ac superessentiali portione spiritûs portare debemus illam ac abyssalem Divinitatem & Divinæ essentiae unitatem, in qua omnes thesauri Divinitatis sunt inclusi. Et tunc interior homo noster amore repletur, & in omni virtute exercitatur, atque exterior homo cum vitiis, & concupiscentiis crucifigitur, & ad omnes poenalitates extenditur, & sentire per passionem incipit passionem Domini nostri, & quicquid fuit in Christo IESU.

Quando igitur sic dispositus est homo, tunc in recto itinere & in recta via id est Christo IESU est constitutus, qui est via salutis nostræ, in qua quisquis ambulat, falli non poterit, dummodo sollicitus sit nullo extra hanc viam membro deviare. Postquam verò anima sic attracta, & per Iugem Dominicæ Passionis meditationem atque memoriam in unionem Charitatis Christi introducta, & in quadam superessentiali libertate inclusa fuerit, (quemadmodum tres illæ in beata Trinitate Personæ, unitæ, & in Divina essentia sunt inclusæ) tunc spiritus introrsus rapitur, & in Divina essentia per abstractionem unitur. Ibi tunc Divina Claritas spiritum transradiat, & mentem ipsam Divino quodam diademate illustrat, atque radios suos deorsum in inferiorem animæ partem dirigit, per quod animæ ratio simplificatur, illuminaturquè, & qualiter in via DEI interiùs, exteriùsquè incedere debeat, edocet, & intelligit.

Vis

Vis concupiscibilis purificatur & trahitur, & irascibilis gratia humilitatis, & subjectionis perfunditur, & ad virtutum exercitia roboratur. Conscientia quoque arguitur, admonetur, & purificatur, & cor accenditur, & in DEUM sublevatur. Ipsum denique corpus ad obediendum spiritui promptum, atque paratum efficitur, ad currendam instar gigantis viam DEI, eo videlicet modo quo nos Christus Dominus præcescit. Sic, sic nimirum homo abstractus in DEUM transformatur. O quando enim tria hæc taliter in uno desiderio, in uno amore, & in eadem intentione sunt congregata, tunc liber patet accessus spiritui ad quiescendum in essentia Divina, & ad commorandum in tabernaculo Humanitatis suæ. Taliter ergo per meditationem dominicæ Passionis ingredi debemus, quatenus de cætero nunquam exeamus. Sed istud modernis temporibus perrarum est, & insuetum. Attamen Dominus ait: Qui non intrat per ostium in ovile ovium, sed ascendit aliunde, ille fur est, & latro. Quia tamen tam pauci ingrediuntur, idcirco in via DEI tam multi deficiunt, sed istis in hora mortis ipsorum difficilis nimium ac deserta quædam via pandetur. Quod autem tam multi istis temporibus in errores varios, & in ipsum quoque infidelitatis vitium labantur, inde potissimum fit, quia fundamentum suum interius & exterius in Christo JESU non posuerunt. Et quidem multi sunt, qui dominicam Passionem ab extra intuentur atque recogitant, sed ab intra fundus ipsorum imaginibus atque creaturis vanis est depictus, atque obsessus. Et ideo pauci sunt, qui eam veraciter induunt, & in ea commorantur, eamque tar-
do passu sequuntur. *Hec Anonymus.*

*Praxis generalissima, omnium praxium maxima,
oprime, utilissima.*

IN Praxi præter suprâ notata sub praxi § 2. hæc accipe. Et in via incipientium, & in via proficientium, & in via perfectorum DEUS-Homo Crucifixus indefinenter diu noctuque ob oculos tuos versetur: ipse sit Objectum veræ sapientiæ, perfectionis, sanctitatis: ibi cuncta reperies in altissimo gradu virtutis. Et
Benedicite ei, qui.

Hebr. I 2.

quidem in *via incipientium* considera in Christo Crucifixo rigorem Divinae Justitiae, adeò Patris aeterni in unigenito Filio suo peccata nostra acerbè punientis; & excita in te Timorem DEI: quia si hæc in viridi, quid in arido fiet, quantum exæstuat in te ignis ille æternus, nisi citiùs ad meliora te receperis? Virtutes fundamentales ubi magis relucet, quàm in JESU Crucifixo? Ibi Resignatio sui in voluntatem Patris cœlestis, & Obedientia usque ad mortem amarissimam & prebrosissimam Crucis: ibi Contemptus mundi, & extrema Paupertas in nudo JESU: ibi durissima Poenitentia dolentis, lachrymantis, orantis, facistacientis JESU pro peccatis nostris: Ibi extrema Mortificatio, nullum solatium, nisi fel, & alias amaritudines acerbitatesquè recipientis JESU. In *via proficientium* habes motivum ipse ex Crucifixo, qui *proposito sibi gaudio, sustinuit crucem, consensu contempta*: quantum illud gaudium, ad quod Filius DEI seipsum & suos electos venire voluit per arduum Crucis medium? Inde dilectam Justitiam, quàm Crucifixus reddidit, cuiquè quod suum erat, Patri cœlesti cultum Religionis, ipsum orando, ejus honorem à peccatoribus contemptum restituendo per sui humiliationem usque ad ignominiam Crucis: Matri suæ benedictæ observantiam, gratitudinem, pietatem, ipsam suo dilecto Discipulo Joanni in providentiam commendando: Discipulis imò omnibus Electis pietatem, eos in filios per Joannem Matri suæ tradendo: Liberalitatem omnibus nobis usque ad proprii cordis, & sanguinis effusionem exhibendo. Quanta fortitudo, magnanimitas, patientia, perseverantia ad ultimum halitum, humilitas, aliæquè virtutes in Crucifixo relucet! eas in te exprime. In *via perfectorum* existens, si ubi tum in Crucifixo DEO-Homine perfectiones Divinae Sapientiae, Bonitatis, Justitiae &c. effulgentes contemplari potes. Deinde quid in te magis accendere flammam amoris in DEUM & proximum valet, quàm Agnus ille cœlestis in Cruce amore tui affatus, quàm ignis ille amoris per ostium lateris i.e. corde ipso per aliasquè fissuras vulnere ebulliens? Vides cunctate posse in Crucifixo reperire.

Deinde, quod concernit objectorum motivorum hac 2. 2. p. propositorum, eadem coordinata Crucifixus ad exercitium

tium tibi praesentabit. Certum enim est Christum perfectissimo modo omnes virtutes immediate enumeratas, & alias, in Cruce peregrinasse ex omnibus compossibilibus motivis virtutum; motiva enim multiplicem bonitatem & perfectionem refundunt in actum. Hinc v. g. Crucifixus exercendo actum Patientiae; exercuit illum ex his motivis, quia scilicet est honestus seu conformis lumini rationis, conformis legi Divinae, conformis voluntati aeterni Patris, conformis statui gratiae & gloriae &c. Ergo & tu respiciens Crucifixum, fac similiter.

Ad hanc Praxim jugis memoriae Crucifixi, eique conformandi, & in eum transformandi vitam tuam, praestent sunt sequentia incitamenta.

I. *Seraphicus Doctor inquit*: Si vis, ô homo, de virtute in S. Bonaventura virtutem, de gratia in gratiam, de bono in melius proficere; *ra de Pass.* quotidie quantâ potes devotione, mediteris Dominicam Passionem; nihil enim in anima ita operatur universalem Sanctificationem, sicut meditatio Passionis Christi. *Bernardus de Busto*: Bernard. de Magis meretur vel unam solum lachrymam emittens ob memoriam Passionis Christi, quàm si usque ad terram promissionis peregrinaretur. *B. Albertus*: Simplex recordatio vel meditatio Passionis Christi, plus valet, quàm si quis per annum jejunaret in pane & aqua, quâlibet sextâ feriâ, vel se usque ad sanguinem cederet, vel quotidie psalterium legeret. Cujus rationem reddit *Ludovicus de Ponte* his verbis: Quia praedicta opera, etsi bona valde & utilia, non habent tantam vim ad purificandum Cor à suis vitiis, illudquè veritatibus illustrandum, & inflammatis amoris Divini affectibus perficiendum, atque attempta & profunda Passionis Christi meditatio; quae omnia haec efficit, additquè etiam spiritum & vitam poenitentis ipsis, & operibus externis, permovendo efficaciter ad ferventem eorundem exercitationem. *Thomas Kempensis*: Qui se inten- & devotè in Passione Domini exercet, omnia utilia & necessaria sibi abundanter ibi inveniet; nec opus est, ut extra JESUM aliquid melius quaerat. O si JESUS Crucifixus in cor nostrum veniret, quàm citò & sufficienter docti essemus? *B. Magdalena de Pazzis Lanciz opuscul.* divinitus edocta est, quod quoties creatura offert sanguinem

Bernard. de Busto S. 15 in-

B. Albertus Magnus tr. de sacrif. Miss.

Lud. de Pont. 4. v. introd. ad med.

L. I. c. 25. § 6.

Ibidem.

11. n. 56.

Christi, quo redempta est, æterno Patri, tale donum offerat, ut ille quasi non habeat pretium, quo solvat. Hoc donum esse tam magnum, aiebat, ut Pater æternus se reputet obligatum creaturæ suæ. Christus s. Maria Magdalene de Pazzis dixit: Dico tibi, si qualibet feriâ sextâ attendas horæ, quâ expiravi in Cruce, continuo recipies particulares gratias à Spiritu, quem reddidi Patri æterno; & quamvis illas non senties, nihilominus semper requiescent in te. B. Joanne ab Angelis revelatum est, Divinam Majestatem cum tanto affectu amoris accipere planctum ob passionem Christi, & illum adeò gratum esse sacrificium, ac si spargeretur sanguis, & afflictiones magnæ pro eo tolerarentur.)) Cur autem DEUS tantopere desideret nos assimilari Christo Crucifixo, Ratio est: Quia, cum furum & raptorum propria poena sit nunc patibulum, ut crux olim; jam verò nos cum Protoplastis nostris siquidem fuerimus loci furum (dæmonum scilicet complicum Luciperianæ ambitionis, volentis furari seu rapere altitudinem DEI, eiquè assimilari) cupientes esse sicut Dii, scientes bonum, & malum, ad similitudinem ipsius DEI: Merito Justitia Divina tanquam fures & raptores decrevit nos agi in patibulum Crucis (quanquam multo graviore poenâ & ignominia fuerimus æternum digni, nisi Filius DEI suâ furcâ nos pro infinita bonitate liberasset) Tum ut aliquantum ex parte nostra quoque satisfaciamus pro peccatis nostris actualibus, occasionem trahentibus ex originali (pro quo Christus plenè satisfecit quoad culpam & poenam, impeditivam visionis beatificæ, ut in parvulis baptizatis morientibus patet) Tum ut in vicem gratitudinis & amoris Christi immensi aliquid tolcremus: Tum ut Christo assemilemur in patientia, humilitate, aliisque virtutibus, exequentes gratissimum beneplacitum DEI, ad majorem ejus gloriam, & illustriorem nostram in Cælis coronam.

II. *Exempla.* Christus totâ suâ vitâ passus & internè crucifixus fuit: vide *suprà sub Patientia.* Beatissima Virgo iugiter occupabatur in contemplatione Passionis Filii sui: vide *suprà sub Patientia, vel Martyri.*

1. Cor. 2. 7. 2.

Alia Exempla ex P. Lobner Bibli. man. Passio. I. S. Paulus tam assiduus erat in meditanda, & prædicanda Christi Passione,

ne, ut dicere auderet, se nihil scire, nisi IESUM Christum, & hunc crucifixum. 2. Cum S. Maria Magdalena, postquam se *Sylvest. in ros.* in Eremum contulerat, supplicem à DEO petiisset, ut, qua in re *aur. 1. 4.* potissimum se occuparet, ostendere dignaretur, S. Michael Archangelus ei Crucem pulcherrimam in aditu speluncae sic constituit, ut in oculos Magdalene semper incurreret, neque illam unquam mysteriorum patratorem oblivisci pateretur. 3. Quidam Eremita certior fieri cupiens, quibus maximè obsequiis Divinum Numen demereri posset? semel Christum nudum, *Ludolphus in* plagis lividum, & cruce onustum conspicuum habuit, qui ei *sax. in vita* dixit, rem sibi gratissimam fore, si eius cultores in Cruce *Christi.* fenda eum adjuvarent: hoc autem facturos, si recordatione suorum cruciatuum eum profecuti, partem eorum, in sui cordis sensum derivarint. 4. B. Clara de Monte Falco in IESU *surius in vita* crucifixo sive vigilans, sive dormiens, hærebat. Cum semel in hoc exercitio graviter confixa fuisset, apparuit ei Iuvenis humeris Crucem ferens, & dicens: Filia mea Clara, quæsi locum solidum, in quo hanc Crucem plantarem, & inveni cor tuum: ibi eam figere volo: oportet ergo, ut moriaris in hac Cruce, si filia mea, & hæres vis esse. Exinde adeò impressum cordi habuit Passionis Mysterium, ut quidquid comederet, ei amarum foret in memoria Passionis, & quidquid videret, intelligeret, & diceret, felle Crucis Christi respersum crederetur. Unde post mortem omnia instrumenta Passionis cum ipso Crucifixo, cordi impressa cernebantur. 5. Dum S. Joannes Evangelista ad *Engelg. in* huc in terris existens arderet videre DEI param gloriosam, illa *Dom. Quinqu.* ipsi apparens bene longum cum eo de cruciatibus Christi *6. 3.* sermonem texuit, & inter alia dixit, Filium suum ei, qui iugiter Passionem ejus recoleret, tres prærogativas concessurum I. Ut ante mortem ferventis Contritionis actum exercere possit. II. Ut DEI para in agone ipsum specialiter defendat. III. Ut per ipsam quidvis impetrare possit. 6. S. Gertrudis Divi *Blos. cap. 2.* nitus discebat, quoties quis Christi Crucifixi Imaginem animo *monit.* piè commoto apexerit, toties Divinæ pietatis oculum ei ad- *Vincent. in* verti. 7. S. Edmundo adhuc puerulo Christus apparens sua *spec. hist. Suri-* sit, ut quotidie aliquod mysterium vite aut passionis suæ *taretur; ut in vit.*

taretur; id enim ei contra quasvis tentationes, ad comparandas etiam, conservandasque virtutes, & tandem ad mortem feliciter obeundam, singulare præsidium fore. 8. B. Bonaventura *March. tr. 3.* rogatus à S. Thoma Aquinate ut Bibliothecam ostenderet, ex qua *lett. 18. prop. 1* tam sublimem scientiam hausisset, Crucifixi imaginem oculus *Chron. Min:* & lachrymis detritam ostendit. 9. S. Franciscus petens à DEO, *lib. 1. c. 105.* quo exercitio maximè DEO placere posset, ter Missale aperuit, semperquè Passionem reperit.

Igitur Christus Crucifixus sit Christianæ vitæ tuæ causa seu Objectum Materiale, Causa seu Objectum Formale, Causa Exemplaris sit medium principale & efficacissimum ad obtinendum omnem finem supernaturalem. DEUS-Homo Crucifixus est Centrum veræ sapientiæ, à quo potissimum denominatur hæc Theologia spiritualis.

§. 8. avus.

Dico. Objectum actuum Vitæ spiritualis revelatum & creditum, ut conforme Exemplari Vitæ DEI paræ: illudquè ut tale intentum, est causa formalis actuum bonorum, supernaturalium, meritoriorum. Probat de bonitate talis objecti. Quia si ex conformitate objecti ad dictamen rationis bonitas resultat in eodem objecto, ideo, quia est expressivum, Legis æternæ, multò magis resultabit ex conformitate ad exemplar vitæ DEI paræ & Sanctorum: cum hoc sit magis insinuativum æternæ Legis, seu dictaminis sapientiæ Divinæ, quàm cæcutiens lumen rationis: insuper idem exemplar magis est manifestativum voluntatis DEI bonæ, beneplacentis, & perfectæ: Tum maximè expressivum similitudinis, imaginis, & exemplaritatis Vitæ DEI, & Christi.

Porro supernaturalis bonitas præfati objecti exinde probatur: Quia Christus moriturus in Cruce commendavit MARIAM Ioannem in filium, Joanni MARIAM in Matrem, dicens: Ecce Mater tua. Et ex illa hora accepit eam Discipulus in suam: *Joan. cap. 19.* Ubi intelligitur, quatenus Joannes moralis seu adoptivus filius Mariæ, non solum ei provideret necessaria vitæ, eamquè veneraretur, & amaret, ut Matrem suam, verum etiam maximè

maximè ejus mores maternos imitaretur: hoc enim est proprium filiorum, non physiognomiâ tantum, ut solent filii, sed & moribus matrizare. Et Paulus: Mementote ait Præpositorum vestrorum, qui vobis locuti sunt Verbum DEI, quorum intuentes conversationis exitum, imitamini fidem. Super quod Franciscus Arias ita discurret. Si nos Apostolus invitât ad imitationem Apostolorum, & De imitatione Apostolicorum virorum. Multò æquius invitât nos ad imitandam sacratissimam Virginem ipsorum nimirum Apostolorum Magistram, & perfectissimam præfat. Apostolicæ vitæ exemplar. S. Ambrosius ait: Talis fuit MARIA, De Virginibus ut ejus unius vita omnium disciplina sit. Idem. Quicumque sibi MARIÆ exoptat præmium, ejus imitetur exemplum. Et D. Bernardus Hom. 2. super dicit: Ipsam (MARIAM) sequens non devias scilicet à vita supernaturali. Ecclesia quoque canit: Cuius vita (id est Mariæ) gloriosa cunctas illustrat Ecclesias: nempe ad supernaturalem virtutum sequelam.

Hebr. 13.

Ad Præxim spectantia vide proportionatè Notata sub Praxi § 2. & § 7.

§ 9nus.

Dico. Objectum actuum vitæ spiritualis revelatum & creditum, quod sit conforme Exemplari vitæ Sanctorum, illudquè ut tale intentum, est causa formalis actuum bonorum, supernaturalium, meritoriorum. Ratio primæ partis de bonitate talis Objecti eadem quæ & de conformitate ad exemplar vitæ DEIPARÆ supra specificata. De supernaturalitate autem ejusdem Objecti ut revelari eadem quoque auctoritas scripturæ hic servit, quæ allata est supra sub vita DEI paræ, ubi Paulus dicit: Mementote Præpositorum vestrorum &c. Idem quoque Apostolus ad sui imitationem hortatur: Esote imitatores mei, sicut & ego Christi. Deinde Ratio est: Sancti, ex quo pro talibus publicâ Ecclesiæ auctoritate recepti, vel Canonizati, fide Divinâ creduntur esse Sancti. Ergo & actus sanctitatis, vel virtutum ejusmodi Sanctorum revelantur, & creduntur esse veri actus virtutum supernaturalium: propter enim actus verè sanctos & virtuosos tum gratiam sanctificantem, illos comitantem, sunt Sancti. Ergo qui est conformans actus suos ad actus virtutum alicujus talium Sanctorum, conformabit supernaturaliter, quia conformabit tantumquam

quam ad ideam & formam; adeoque causam formalem tanquam revelatam & creditam supernaturaliter. Reliqua vide ut suprà.

In Praxi applica suprà specificata sub praxi § 2. & § 7.

§ 10. mus.

Vide Suarez de Gratia l. 2. c. quòd sit conforme, seu respectivam ad finem vel statum supernaturalem 16. Dico. Objectum actuum vitæ spiritualis, revelatum & creditum gratiæ, idque ut tale intentum, est causa formalis actuum bonorum, supernaturalium, meritoriorum.

Ratio 1^æ partis est de bonitate imò & supernaturalitate objecti ut respicientis statum gratiæ supernaturalis. Quia sicut bonitas moralis objecti seu naturalis actus habetur per conformitatem ad naturam seu lumen naturæ rationalis, quæ talis: ita bonitas supernaturalis objecti vel actus habebitur per conformitatem, & respectum ad naturam supernaturalem & lumen gratiæ. Unde dicit Christus: Qui recipit Discipulum in nomine Discipuli, vel Prophetam in nomine Prophetæ, mercedem Discipuli vel Prophetæ accipiet. Quibus insinuat Misericordiam factam homini, quæ homo est, sortiri bonitatem naturalem: factam autem homini, quæ gratia supernaturali prædita, suscipere bonitatem altioris ordinis seu supernaturalis. In hunc modum monebat & Petrus Apost. Nemo patietur ut maledicus. Si autem, ut Christianus, glorificet DEUM in isto nomine. Paulus quoque Apostolus idem respicere videtur numerans patientiam, mansuetudinem, aliosque actus morales inter fructus Spiritus: isti enim actus dum fiunt non naturaliter sed spiritualiter, accipiunt rationem altioris virtutis, fiunt autem spiritualiter, dum mensurantur per superiores fidei regulas nempe per gratiam & veram sanctitatem.

Confirmatur. Quia contingit non rarò virtutem aliquam per lumen naturale comparatam ad statum, & vires naturæ, multum excedere hic & nunc medium virtutis: Comparatam tamen eandem virtutem per cognitionem supernaturalem ad statum virium gratiæ supernaturalis, non modò excedere imò & deficere à medio, vel saltem illud attingere. Quod patet in

in Christianis, qui ex vi status sui per gratiam formati, obligantur sanctius vivere, quam infideles in sua natura relictī: Item Ecclesiastici, & Religiosi tenentur ad maiorem perfectionem, quam communis populus Christianus ob specialem gratiam. Ita quod multum est ad mensuram naturæ, parum est ad mensuram gratiæ, quod item multum ad exiguum gratiam, id confor-
 forme est ad multam gratiam. Patet ergo, quod supernaturalitas actuum regulatur iuxta statum gratiæ.

Quantum spectat ad bonitatem & supernaturalitatem objecti per respectum ad statum gloriæ æternæ Ratio est quia *Vide Vasquez* virtutes distinguuntur secundum diversas politias, ad quas or-
disp. 86. cita-
 dinant subiectum, ut docet Arist. 3. Polit, Cap 3. Atqui po-
tum à Lugo de
 litia cælestis est supernaturalis, politia humana quæ talis est *fide disp. 9.*
 naturalis. Ergo & actus virtutis ordinans hominem, seu respici-
sect. 1.
 ens ut ordinatum ad politicam cælestem, erit supernaturalis, actus verò ordinans ad politicam humanam, erit naturalis. Et ita servare æqualitatem juris cum homine, ut spectat ad Rempublicam humanam, erit actus iustitiæ naturalis, nisi illum supernaturalizet fides, servare autem æqualitatem juris cum homine ut elevato ad supernaturalem beatitudinem & Rempu-
 blicam sanctorum, erit supernaturalis.

Huc referuntur illi, qui supernaturalitatem virtutibus Theologicis tribuunt per respectum ad DEUM, ut est Author donorum supernaturalium gratiæ & gloriæ. V.g. Fidem, spem, amorem esse naturalem, si credatur, speretur, ametur DEUS ut Author naturalis ordinis. Si verò credatur, speretur, ametur ut Author supernaturalium bonorum, esse actus supernaturales.

Sed quidquid sit de sententia horum Scholasticorum, qui tribuunt supernaturalitatem virtutibus per respectum ad statum supernaturalis ordinis gratiæ & gloriæ, certum est, quia etsi ex hoc principio, quod respiciant dictum statum supernaturalem, virtutes possint non supernaturalizari, dum nempe ex naturali cognitione procederent; ut censet *Lugo Card:* tamen ex
De fide disp.
 principio alio nempe revelationis & fidei, supernaturalitatem
9. sect.
 ordinariè accipiunt, dum exercentur ex motivo status gratiæ

& gloriæ: quia tam sublime exercitium in Christiano fit ordinariè ex cognitione fidei supernaturali.

Similiter quamvis juxta citatos Authores virtutes essent naturales, si exerceantur per conformitatem & respectum ad naturam rationalem, non ut elevatam ad statum gratiæ vel gloriæ, vel per respectum ad DEUM ut Authorem naturæ: At tamen si exercerentur ex cognitione fidei, quatenus dicta conformitas, & respectus naturalis virtutum est à DEO revelatus, tali medio, servatis servandis sortientur supernaturalitatem præfati actus virtutum: Ut ex suprâ dictis patet.

Ratio secundæ partis Asserti est eadem, quæ suprâ: quia scilicet obiectum ejusmodi supernaturaliter bonum, similem in actum refundit bonitatem, & supernaturalitatem. Adeoque erit tale obiectum causa formalis actuum supernaturalium bonorum.


Circa Praxim vide suprâ dicta sub Præxi §. 2. & §. 7.


et hinc proportionate accommoda.

Finis in Secunda Secundæ, Theologiae Spiritualis.



PARS






In Prima Secunda Carta

Fol.

150.



Quest. 10.
p. 32